

պատուական ի տան անմահ թագաւորին Յիսուսի. զոր Տէր Աստուած անփորձ և անսայթաքելի պահեսցէ զմեծութիւն ձեր մինչև ի խորին ծերութիւն, հանդարտ և խաղաղարար թագաւորութեամբ, ի հանոյս բարերարին Աստուծոյ, ըստ մեծին Կոստանդիանոսի և Թէոդոսիցն. և յետ աստեացս վճարման՝ անմահ թագաւորութեան արժանի արասցէ, դասակցել ի կայանս Սըրբոցն յարագուարճ բերկրանօք և մշտակաց ուրախութեամբ, ի տեսութիւն փառացն Քրիստոսի. ամէն:

Եւ յետ սիրալիր ողջունական բանիցս, ծանիր ո՛վ ամենայաղթ թագաւոր, զի թագաւորք երեսփոխան են անմահ թագաւորին. և որպէս նա ծագէ զարեգակն իւր ի վերայ չարաց և բարեաց, և ածէ անձրև ի վերայ արդարոց և մեղաւորաց, այնպէս թագաւորք պարտին զորովագութ սիրով այցելու և խնամածու լինել ի վերայ ամենայն քրիստոնէից, ըստ ասելոյն Սողոմոնի. « Մի՛ զրկեր զազքաճան՝ որ յեցեալ և յուսացեալ իցէ ի քեզ »: Քանզի սակաւ ազգըս մեր՝ որ վասն աւերման աշխարհիս Հայոց և ալէկոծութեան՝ ցիր և ցան սփռեալ եղեն ընդ ամենայն երեսս երկրի, ոմանք առ Վիրս, ոմանք առ Խորին Պարսիկս, իսկ ոմանք յարևմուտս, նաև ի Միջագետս Ասորոց, կան նշգեհացեալք և պանդխտացեալք: Իսկ սակաւս ի բազմաց յազգէս մերմէ եղեն ընդ հովանեաւ թագաւորութեան ձերոյ, իրր աւանդ ինչ ի պատուական տեղւո՞ զգուշաբար շինեալք և պատուասիրեալք ի նախնեացն և ի խնամոց ձերոց մինչև ցայսօր: Եւ մեր լսելով յարաժամ զնոցայն ապահովութիւն՝ և զչնորհակալութիւնն որ ի ձէնջ, գոհանամք զբարերարէն Աստուծոյ և մարդասիրէն, և փառս մատուցանեմք նմա, և յաղօթս հայցեմք միշտ՝ տալ երկարակեցութիւն ձերոց թագաւորութեանց: Եւ զնոյն սէրն և զխնամքն՝ հայցեմք ի քէն, ո՛վ ծիրանածին մեծ բարեպաշտ Վլատիլլաւ թագաւորդ Լեհաց, պահել և ոչ նուազել. զի ամենայն թագաւորք երկրի տեսցեն զբարիոք խնամարկութիւնն որ ի վերայ նոցա, և փառաւորեսցեն զՀայր ձեր որ յերկինս է. մինչև այց արասցէ Աստուած՝ մեզ, և դարձուցցէ զգերութիւնն Յակոբայ, և յիշեսցէ զբաշխնքն զայն՝ զոր եդին մեծամեծ հայրապետքն և թագաւորքն մեր. այսինքն Սուրբն Սեղբեստրոս և Գրիգորիոս, Կոստանդիանոս և Տրդատիոս, և վասն հաստատագոյն մնալոյ ուխտին՝ զարին Կենարարին ի մելան խառնեալ, նովիմք գծագրեցին և հաստատեցին դաշինս: Զնոյն սէրն հայցեմք ի Զէնջ, և ոչ զանոտի հակառակաբանութիւն:

Զի սակաւ մի կարճ ի կարճոյ յուշ առնեմք քոյին սուրբ թագաւորութեանդ. զի եկն եհաս լուր ի լսելիս մեր վասն նեղութեան ազգին մերոյ՝ որ կան ընդ հովանեաւ Չերում թագաւորութեանն, մանաւանդ ի մայրաքաղաքն Լեվ. Թէ, զեկեղեցիս առեալ են բռնութեամբ ի ձեռաց ազգիս մերոյ, և քահանայք և ժողովուրդք շրջին իբրեւ զոչխարս մոլորեալս՝ որոց ոչ իցէ հովիւ. զոր ոչ կարեմ մի ըստ միսջէ յերկարել քո սուրբ թագաւորութեանդ, վասն աղէտից: Եւ մեք յորմէ հետէ զայսպիսի իրս լսեալ եմք, կսկիծ և տրտմութիւն և նեղութիւն շատ ունիմք, քան զայս՝ որ յայլասեռիցս կու կրեմք: Վասն որոյ